

La'ó Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-77234330 (mobile) email: laohamutuk@gmail.com

Website: www.laohamutuk.org



Dili, 8 Jullu 2021

Komunikadu Imprensa

Kazu Abuzu Seksuál: Presiza iha Unidade atu Respeita no Suporta Vítima, no Asegura Prosesu Justisa La'ó ho Efetivu

Introdusaun

La'ó Hamutuk kondena kualkér tipu abuzu seksuál, no ami suporta vítima husi krime hanesan ne'e. La'ó Hamutuk apresia kazu bele la'ó iha tribunal maske ami preokupa katak kazu seidak hetan progresu ne'ebé efetivu liu no hetan presaun polítiku husi ema boot, no hahalok iha rede sosiais no media ne'ebé bele aumenta sofrimentu psikológiku ba vítima sira. Tendénsia hirak ne'e bele fó ezemplu negativu ba vítima seluk iha futuru, ka halo vítima seluk ta'uk atu lori kazu.

La'ó Hamutuk apresia ba vítima sira nia korajen bainhira ko'alia lia-loos iha situaun todan, no korajen husi maluk ativista no jornalista sira ne'ebé ho barani foti sai kazu violasaun seksuál ne'ebé komete husi eis padre Richard Daschbach kontra joven fetu balun ne'ebé hela iha Orfanatu Topu Honis Oecusse. Ami hanoin katak luta ida ne'ebé sei iha hela difikuldade naruk tanba ema balun tenta atu halo intervensaun, espekulasaun no proteje atór.

Violasaun seksuál kontra fetu no labarik fetu sira nudár aktu krime graves ida, luta kontra aktu ida ne'e presiza tau forsa hamutuk hodi luta kontra krime violasaun seksuál. Ativista, jornalista, Estadu, instituisaun direitus umanus no populasun tomak presiza foti asaun ho maneira diferente hodi luta nafatin ba seguransa fíziku, privasidade no liberdade fetu no labarik fetu sira nian.

La'ós ona segredu katak kazu violasaun seksuál barak tebes iha mundu tomak hanesan violasaun ne'ebé eis Padre RD komete. Kazu hanesan ne'e la'ós úniku ne'ebé foin akontese ba joven fetu sira ne'ebé hela iha Orfanatu Topu Honis Oecusse, kazu barak konsege sai ba públiku no barak mós kontinua enfrenta dezafiu atu hetan julgamentu no justisa liu mekanizmu legal.

Maske kontinua iha dezafiu atu atinje kazu violasaun zero maibé esforsu barak halo ona husi ativista, jornalista, no autoridade relijiozu sira atu prevene no kombate aktu kriminozu kontra humanidade, liu husi demite padre sira ne'ebé komete violasaun seksuál, selu kompensasaun no husu deskulpa ba vítima sira.

Kazu Topu Honis fó lembra fali ba ita kona-ba violasaun seksuál graves ne'ebé militar Indonézia sira komete durante okupasaun ilegál, husik hela kanek no fitar barak iha istória Timor-Leste nian. Ema barak ne'ebé buka justisa no dudu prosesu julgamentu seidak hetan prosesu efetivu ruma atu prosesa autór sira.

Iha Timor-Leste fetu no labarik sira dala barak seidak hetan sira nia direitu umanu – inklui nutrisaun, edukasaun, no liberdade husi violasaun fíziku no seksuál. Ema balu lakohi rona kona-ba sira nia realidade, no la fiar sira nia testemuña. La'ó Hamutuk hanoin katak ita hotu, inklui sistema judisiál, tenke fó atensaun ba sira nia liafuan sira, no asegura sira nia direitu ba privasidade no justisa.

Asuntu xave

La' o Hamutuk preokupa tebes ho prosesu justisa ne'ebé la' o neineik loos, atrazu ida ne'e sei prejudika liu tan vítima no serteza justisa ba vítima sira no akontabilidade ba arguidu dook ba beibeik husi esperansa ema sira ne'ebé buka justisa. Ami hanoin katak efetividade husi prosesu justisa nudár forma forte husi asaun preventiva atu la repete kazu violasaun iha futuro. Ami preokupadu katak kazu ida ne'e la' o neineik loos iha Tribunal, no iha possibilidade kazu sei la la' o ka sei prolonga ba beibeik.

Ami preokupa ho publikasaun sira husi *The Oekuse Post* ne'ebé halo esforsu sistemátiku atu dezvia lia-loos no hamenus kredibilidade luta kontra aktu violasaun seksuál ne'ebé eis Padre RD komete. Ami sente triste katak Jornalista balun tenta atu distorse lia-loos ho lia kle'uk sira no haluha étika no valor jornalístiku sira sobre lealdade no a favór ba vítima no direitus umanus.

Husi video sira ne'ebé prodús husi *The Oekuse Post* la subar joven fetu sira ne'e nian oin, ami preokupa katak ida ne'e la ajuda no la respeita diretu ba privasidade, vulnerabilidade, no seguransa ema hotu nian iha kazu sira ne'ebé liga ho ema nian moris privadu.

Rekomendasau

- Ami husu autoridade justisa nian tomak atu halo esforsu liu tan nune'e sei hatudu katak Estadu Timor-Leste konsidera violasaun seksuál ba labarik nudár krime grave tebes, no iha kapasidade no vontade atu hala' o prosesu judisiál ho efetivu. Kazu ida ne'e bele sai oportunidade atu hatudu ba vítima sira seluk no mós autór: Timor-Leste la simu abuzu seksuál.
- Ami enkoraja Ministériu Públiku nudár responsavel ba asaun penal ba kazu ida atu halo esforsu hodi asegura la bele hanaruk durasaun julgamentu ho razaun laloos.
- Ami husu Ministériu Públiku atu husu ba tribunal hodi muda medida koasaun husi termu identidade rezidência (TIR) ba prizaun preventiva tanba husi hasoru malu ho joven fetu sira iha tribunal distritál Dili ne'e bele iha influencia ba sasin no evidénsia sira, no kauza trauma psikolójiku.
- Ami mós enkoraja atu entidade relevante sira hanesan Komisaun ba Direitu Labarik no PDHJ bele foti medida apropriadu atu proteje diretu ba privasidade no seguransa iha situaun atuál.
- Ami haree katak jornalista no media sira hotu presiza iha korajen liu tan atu halo publikasaun ida ne'ebé professional liu no loos liu atu asegura diretu umanu no seguransa ba privasidade iha kada publikasaun sira. Ami enkoraja media no jornalista sira atu hamriik metin no afilia ba lia-loos no defende valór sira kona-ba diretu umanu no justisa ba vulneravel sira.
- Ami mós enkoraja atu kolega ema sira ne'ebé servisu iha organizaun sosiedade sivil, media no entidade públiku sira atu hamriik metin hodi luta ba nafatin ba justisa no direitu umanu, no fahe informasaun ne'ebé loos iha kazu ida ne'e.
- Ami enkoraja públiku atu la' o ho korajen atu prevene no hakribi aktu violasaun ne'ebé mundu tomak luta atu kombate.
- Ami husu ema hotu-hotu atu buka informasaun loloos, no la bele depende ba lia anin ka informasaun falsu. Bele hetan informasaun oin-oin kredivel ne'ebé ami halibur husi publikasaun sira iha ne'e; <http://www.laohamutuk.org/Justice/2021/RD/21Daschbach.htm> .

Obrigadu.